

朱氏重脩遯浙支譜

254  
2590  
4

朱氏家譜卷五

中茶院

十二世孫之榛編輯三十三世孫景邁增補

嘉興府志列傳

朱為霖字雨甫為弼弟附生氣岸不凡讀書觀大略從陽湖孫星衍  
婁縣陳廷慶講學益進試屢不利乃貲為丞署南昌縣丞條上巡撫  
程公含章數千言陳所疑四事辨儒吏尤精慎巡撫批答優獎旋權  
贛縣事懲庫吏之蠹民者比受代以疾卒著有似山堂詩二卷樂府  
一卷遺文一卷季弟為變字理堂附生與嘉善郭慶錢塘陳鴻壽倡  
和皆推重其詩清婉芊絲有金風亭長風味著有傳石齋詩集

上程中丞書

按當湖文繫刻本

竊聞之事有不可恃者時有不可失者於不可恃而恃之將進退由  
而失據於不可失而失之將名實由而竝喪此古來聖賢所以兢惕  
豪傑所以寒心也夫所謂不可恃者何恩與虛名是也不可失者何  
難得之時與有爲之位是也今中丞當 郅治之世受 天子付畀  
之重巡撫江西將出其平昔之經濟比隆唐虞三代之盛其尤重者  
亟宜選舉賢才屏去資格移風易俗改弦而新之使敝壞不可爲之  
習由此而盡革先天下而倡始不仁之遠與皋伊並績名實相符無  
絲毫遺憾豈非時之不可失者乎苟因循舊習不先務之急賢愚一  
途不爲分別徒以紙上空文增成故事爲霖不能無杞人之憂卽以  
江西近日而論去歲阿中丞鄧藩司俱係 朝廷不次擢用之人未



及期月俱以事去二公之去雖其賢否不可同日語而進退失據同也豈非事之不可恃者乎易曰拔茅茹以其彙征吉言君子宜以其類進也又曰君子道長小人道消言一君子在上眾君子皆得進用而小人自然絕迹也茲幸 聖明在上軫念江西民瘼特甚及其吏治之蠹尤非各省比治之非執事莫可爰是特申 簡命由山東來撫江西爲霖不敢默默以負平日高山仰止之思謹陳其所惑者伏祈俯而察之執事講求治道必先得人苟無其人縱有良規善政將何所施孟子曰徒善不足以為政徒法不能以自行言無人也記曰文武之政布在方策其人存則其政舉傷無人也書曰在知人知人則哲惟帝其難之論語曰論篤是與君子者乎色莊者乎言知人之



難也執事傳見爲霖輩立問一二語而退將以爲異日用人地乎抑  
不過奉行故事已乎若欲爲異日用人地此固非慎重求才之道矣  
若不過奉行故事而已此又非爲霖夙昔所仰望於執事者也此其  
所惑者一也爲霖不肖不自愛惜援貲爲丞枉尋而求直尺與市井  
無賴銅臭之夫草野目不識丁之輩等類比肩原無足數惟是含垢  
而甘心爲之者蓋以文章知己千古爲難屢辱於庸耳俗目憤不能  
平十上鄉闈不邀一薦行年忽忽時已四十恐填溝壑以負天地之  
所以生我者私心不能自己適 國家旣闢此途遂隱忍就之昔者  
傳說版築伊尹負鼎百里自鬻甯戚飯牛彼帝師霸佐之才急於救  
世尚不免於困辱是故得失時也窮達命也用舍天也知其不可爲

而固爲之者人也欲以人力而回天之命時之窮者所謂行其義也  
不敢效潔身自好之流也此有志之士所以飲恨泣血而不自悔者  
也今夫伯樂一過冀北爲之空羣伯喈側耳焦桐爲之生色是以與  
有晏嬰越石登朝堂有叔向然明執手易曰雲從龍風從虎方以類  
聚物以羣分相感而興天道然也今爲霖晉謁階前而執事以眾人  
遇之者在爲霖之素志或不足上格乎尊嚴而執事之神明本亦無  
心於擇吏乎此其所惑者又一也執事以詩文集頒示各屬也豈不  
欲有志者則而效之放而行之乎今州縣以上無論出身概得與其  
餘惟縣佐貳由貢生出身者亦與之夫卽以州縣論其由舉人由進  
士出身者果能讀書能明理乎夫 國家取士鄉試每科天下約千

餘人會試每科約三百人其中讀書明理者苟得十分之二十科之後便可得讀書明理者二千餘人苟得二千餘人分布天下董率而身先之天下安有不治今大小臣寮中實可稱讀書明理而無愧者誠有人矣此人人所共見也執事由縣令游歷今任閱世深矣閱人多矣詎尙有世俗之見存乎抑明知之而無奈何歟此爲霖之所惑者又一也而爲霖又有進者執事所頒察吏八條中有所謂儒吏者夫儒之一字久已無人識矣白虎通曰通天地人謂之儒此詮儒字最爲確切其見高出流輩萬萬夫所謂通天地人者通乎其理也能通乎其理則彌六合贊化育立三才而儒之道行古之所謂儒者固如此自魏晉以降老莊葱嶺之說充塞天地及唐韓子昌黎出而關



之昌黎儒者也昌黎之言曰堯以是傳之舜舜以是傳之禹禹以是傳之湯湯以是傳之文武周公文武周公傳之孔子孔子傳之孟子孟子死不得其傳此韓子之自任也韓子之後宋程朱出而直紹之程朱兩先生醕乎其醕者也其所言者大經大法舍之而無以爲身舍之而無以爲家舍之而無以爲國爲天下縱古今異宜不能盡合苟能通乎其意而變化之內聖外王之道無二理也至明有薛河東胡餘干兩先生其尤著者至我朝侍御陸稼書先生處士張楊園先生與明之薛胡同一轍迹如此乃所謂治也惜乎程朱以下諸儒俱不竟用於世故儒者之事業三代以後卒未能表見於天下今執事正身修德以天下爲己任以胞與爲己責以帝德王道爲必可行以唐

虞三代爲必可復其見確其守堅由格致誠正推而至於修齊治平  
上紹程朱之學而又得位而又遭逢 聖天子效法惟堯千載一時  
非虛語也夫有非常之事必待非常之人有非常之人然後有非常  
之事況執事位至巡撫德隆望重若乘此可爲之時據得爲之勢發  
揮明通公溥之學登崇俊良翊贊 聖朝以臻上理執事亦比肩皋  
夔伊周而無憾執事豈無意於其間乎夫不可恃者事也不可失者  
時也不亟亟求賢以自輔者惑也不能破資格絕畦町以苟安者蔽  
也若爲政之條目美法農田水利刑賞禮樂之大節皆待其人而後  
行者也非所謂當務之急也未學微吏罔識忌諱謹以責難之恭陳  
善之敬干冒嚴威主臣無地伏乞鈞鑒爲禱

撫軍批據言本部院到任以來不能選舉賢才屏去資格因循舊習不急先務賢愚一途不爲分別徒以紙上空文增成故事爲巡撫抱杞人之憂且爲備陳可惑者四事一則接見該員以眾人遇之不能如伯樂之一過空羣一則文集止給州縣以上及縣佐貳由貢生出身者而不給捐班佐雜尙有世俗之見一則謂八條察吏中儒吏一條以爲儒吏古今不可多得均足滋惑等由已悉雖局外之言未足知局中之意且多書生之見未免有不達時務之處然以疏迤微員而能言人之不敢言以直攻巡撫之短可謂有膽有識古不云乎有則改之無則加勉付來書一部藹一匹端硯一方以獎敢言希卽查收該員文已工矣且觀才器何如



似山堂集後識

先君子作文審慎遺稿無多敬檢手自寫定者付刻卽手定本中檢得別紙尺牘稿有云方今稚存惜抱逝矣此調誰彈於是知先君子之文於近時以洪姚二先生爲宗尙竊覘洪先生博稽事理姚先生精究體義所學不歧漢宋而惟實事之求先君子取法近今者如是則於遠且古者可知矣卷末上程中丞稟體式從時所謂言豈一端各有所當也咸豐八年三月男善張謹識

墓志銘

高均儒

敕授修職郎江西候補縣丞署贛縣事 誥贈榮祿大夫朱公卒後三十八年其子善張二品頂戴分巡江南淮揚道將葬公於平湖縣

南門外五里吉圩舊卜之兆乞均儒銘其幽未逮事而粵匪擾平湖  
越二年十二月克復均儒羈淮安善張分巡淮徐揚海道書抵均儒  
痛念先人窀穸來年八月善張卒於沛軍次又來年二月善繼申言  
曰兄子之柩已歸卜於同治四年十二月某日葬我先君仍舊兆秉  
兄善張命請爲銘均儒不敢辭謹按狀公諱爲霖字雨甫其先婺源  
人十六世祖汝賢宋度宗敕題其門曰紫陽義居曾祖明儀內閣中  
書遷浙之桐鄉祖履端乾隆壬戌進士兵部主事本生祖英國學生  
遷平湖遂爲平湖人父鴻猷邑庠生乾隆庚子 召試三世以公兄  
爲弼官兵部侍郎漕運總督遇 覃恩皆贈光祿大夫母吳氏王氏  
一品夫人生母石氏 旌節孝以善張官 贈一品夫人公七歲解

史漢年十六阮文達公取入縣學十應鄉試納貲爲縣丞署南昌縣  
丞嗣上巡撫程侍郎書陳所疑四事其間辨儒吏尤精慎侍郎批答  
優獎道光三年秋代理贛縣事懲庫吏之蠹民者十二月十七日以  
疾卒年四十三歲著似山堂詩三卷遺文一卷嘗謂惜抱稗存云逝  
此調誰彈學不必歧漢宋惟當力求祛俗是其制事有方不專以文  
爲尙矣咸豐同治紀元累遇 覃恩贈資政大夫 晉榮祿大夫娶  
陸氏 贈一品夫人耐窆繼娶蔡氏 封一品夫人子七長善張次  
善鼎九歲殤公爲埋銘善雖兩淮候補鹽經歷善珪江蘇候補知縣  
嗣公弟爲燮善鳳候補訓導卒揚州差次善濤霍邱典史卒於官善  
寶署江甯督糧同知咸豐十一年殉難常州皆蔡夫人出女一適沈



慶齡陸夫人出孫十六人曾孫六人蔡夫人一循公之教勵善雖以  
育孫曾孫曾之以 恩蔭以勞敘得官暨童穉者皆稟承罔敢懈公  
之遺澤孔厚此其徵也敬爲之銘曰

緼之久紹前楷強而仕歲三改奄稱禰子克敏追遠禮介繁祉宅仍  
厥舊神永依紫陽德在來禩煒



國史館列傳

朱善張浙江平湖人胞伯爲弼原任漕運總督自有傳善張以附生議敘通判分發南河補用值海疆不靖在籍倡團練以衛鄉里道光二十二年暎夷陷乍浦率眾堅守縣城賊不能踰平湖而西乍浦克復後浙江巡撫梁寶常檄令勸捐辦理善後各事宜事竣得旨補缺後以同知升用先換頂戴嗣因浙江鑄礮辦工全竣尤爲出力以南河通判酌量卽補二十九年補桃南通判旋署豐北邳北通判三十年調中河通判咸豐二年催趲漕運出力賞加知府銜四年四月捐輸經費以道員選用五月勦辦海流幅匪敗之於城頭村殲其渠賞戴藍翎復勦平徐海各屬捻匪賞換花翎十一月黃河海



口洋匪聚眾滋事時水師凡五路營務廢弛攻剿難期得力漕運總督邵燦以善張屢拏幅匪謀勇兼全令帶勇馳剿悉平之下部優敘十二月訪查海州埭子口地方有另股洋匪萌發卽帶兵剿捕亦悉數就擒五年升裏河同知七年擒匪擾桃宿踞莊家花汀善張疊次帶兵擊走之奉 旨遇有南河道員缺出不論班次卽補八年二月以歷辦籌防各局出力 賞加鹽運使銜七月擒匪窺淮北帶兵馳擊敗賊於臨淮焚賊船數十艘九月粵匪復陷揚州遂統所部回援清淮尋以粵逆陷天長犯蔣壩復馳赴浮山蔣壩等處堵剿悉破之奉 旨賞庫木勒濟特依巴圖魯名號十一月署淮揚道移駐揚州辦理籌防善後事宜揚城自三遭蹂躪十室九空善張招集流亡修

戰守具未幾賊復大至集眾登陴誓以死守然巨礮殺賊酋十餘人賊怒攻益力會天大雨賊始退既而再至再卻卒不得逞九年自夏迄冬賊首陳玉成親率悍黨數十萬眾三犯揚城凶燄張甚疊爲我軍所挫復乘間設伏邀其歸路賊遂大潰卒保揚城旋以捐資餉軍賞二品頂戴授淮揚道十年二月擒匪陷清江善張選派兵勇克之旋移駐清江辦理善後籌防事宜創築圩塞堅壁清野擒匪始困四月兼署淮海道六月 命辦理江北團練事宜十一年九月諭守揚援淮功以善張調度有方應援得力下部優敘同治元年擒匪擾清淮督兵破走之下部優敘旋以裁淮揚道缺改設淮徐揚海道仍以善張署任並兼辦徐州糧台二年九月授淮徐揚海道十一月擒

匪大股出剿善張督練會攻擒匪於睢寧縣境大破之十二月大軍  
剿賊於蒙城善張由間道籌解軍火礮位並採辦軍米下部優敘三  
年七月奮匪滋事督兵赴沛剿之攻破兩圩斃匪千餘人八月卒於  
軍九月得 旨淮徐揚海道朱善張著照軍營立功後病故例從優  
議卹尋 賜卹如例 贈右都御史廕一子以知州用善張服官十  
餘年未嘗去淮淮民被澤久思慕之臚陳其戰功政績請祀名宦  
允之子之枏兩淮候補運判之榛廕生江蘇候補同知之樾候選主  
事之柱候選通判

嘉興府志列傳

朱善張字子弓號山泉贛縣知縣爲霖子少孤道光壬寅海疆不靖



以附生倡團練衛鄉里敘南河通判題補桃南尋加知府銜咸豐甲寅以平徐海各屬捻匪功 賞花翎尋以道員用加鹽運使銜捻首張澂踞長淮鹽道爲梗善張乘夜破之焚賊船三十餘艘復以馳勦天長粵匪功 賞庫木勒濟特依巴圖魯勇號署淮揚道移駐揚州時揚已三遭蹂躪已未賊首陳玉成復率悍黨數十萬來犯誓以死守卒保危城尋得真除加二品頂戴捻匪陷清江善張諭民堅壁清野賊困而竄得復其城移駐之兼辦徐州糧台會僧邸勦捻匪苗沛林於蒙城善張由間道輸饟以濟苗逆平徐境獲安甲子秋督兵赴沛勦辦裔匪以病卒於軍 賜祭葬贈右都御史銜蔭一子之榛知州祀名宦

五十壽序

高均儒

道光二十六年丙午秋賦後質藝於郡博周末庵先生適平湖朱君山泉來謁時君已邀敘通判注南河不應省試而於郡博所猶肅然執弟子員禮也郡屬舊德名門夙推由新安遷桐鄉再遷平湖其先代有至行見稱於鄉邦更著錄於當代能文士大夫之所紀載鄉習聞里中人欣欣相謂經述文章鳴 盛世而迪前光者有椒堂先生先生之弟雨甫先生文竝雅健則君之考也均儒始識君心儀其馴謹繼諭君誦清芬豪於科舉之文被薦者屢矣而注判南河旋擢注同知皆以效浙江軍需及籌善後之 奏敘讀書之志君每歛然均儒先游河上迨君除判桃南移中河以新安先集屬校重刊并刻雨

甫先生西江吟草再諷再勅仰其累世行誼之美蔚然著於詠歌嗣以椒堂先生文集校刻未竣屬足成之過從討論益相得爰悉其高曾規矩孝友傳家愈以欽君能念昔先人宅心知訓以篤駿烈也咸豐元年君以催漕敘知府秩三年淮浦籌防君奉檄統練河營兵勇尋以勦幅匪得藍翎籌餉敘道員注選留中河任四年二月勦捻匪換花翎十月海州洋匪不靖大府以君有謀勇入 告勦平之五年敘功大府尤以爲可倚稱君居心醅正聯章薦擢裏河同知於是君年方登五十其存心之微已上蒙 帝鑒君愈懷慎凡河事軍事承理優優秉心惟誠於斯驗矣退食敬檢甫先生論說書序傳誌遺文散稿屬校合先刻之詩爲似山堂集又以椒堂先生詩集版漫漶



且佚篇太多屬校補重刻夫倦倦于先人箸述惟恐流布之不多且  
久似亦讀書自好者所共能而亦訕然足稱庸行一端之善況由是  
推之議事以制皆庸德之行何莫非此心之厚於仁之外萌者乎嘉  
平九日爲君懸弧之辰君之執友嘉興唐君子冰先期屬均儒一言  
而唐君書表於屏以爲壽均儒不文遲遲未命筆君幕中諸友並樂  
稱觥因唐君以相敦迫均儒不能辭又不敢以尋常頌諛之辭進爰  
敘與君相識之始及累年交誼以見君信友順親獲上之各得其道  
以仁存心迓錫純嘏而大於蒼生者耄耋期頤仁之德與年俱劭  
是真能讀書之驗也孔子曰仁者壽敬誦爲君侑一觴焉

崇祀名宦錄

已故淮徐揚海兵備道朱善張浙江平湖縣庠生道光二十年海疆  
不靖倡團練保鄉里率義旅堅守平湖以功敘通判分發南河補桃  
南通判歷署豐北邳北中河等處通判復以勦捕粵匪功升裏河同  
知洊擢道員署理斯缺該故宦初任南河豐北當大河之衝大汛修  
防周巡不辭勞瘁工程必求堅實丙辰歲大旱河水斷流兩岸農田  
不能栽插乃力請於河督爲陳堵雙金閘之法引微山湖水由中運  
河灌入漕渠民田乃得栽插歲賴有成軍興以來該故宦勦辦海流  
幅匪及黃河海口洋匪擒斬無數捻匪圖竄桃宿之莊家花汀該故  
宦訪知密跡扼要設險殲其前列精銳多人捻首張濬踞長淮鹽道  
梗塞卽乘夜派水軍潛達臨淮焚賊船數十隻以是不敢窺伺淮安

在淮時髮逆直撲蔣壩距清江浦百里許勢危甚乃扼險督兵沿河  
列營賊不敢偷渡礮斃偽酋乘勢渡河追殺數十里賊燄稍戢郡賴  
以安己未授淮揚道移駐揚州防勦次年春擒匪大股東竄犯淮清  
桃連陷該故宦聞警連夜趕備軍器行糧首先到淮卽克清河及桃  
邑當駐揚時髮賊僞英王自六合竄儀徵直撲揚州大股長驅占踞  
平山堂圍城環攻該故宦登陴固守晝夜冒寒指揮遂與提督馬德  
昭張玉良合謀迎勦敗賊於七里店又追擊於儀徵之西派副將艾  
得勝擊之於平山堂追至甘泉山淮郡始紓南顧憂旋辦徐州糧臺  
積勞成疾卒於沛縣軍營奉 恩旨議卹在案該撫等所請朱善張  
入祠名宦祠查核事實係屬相符謹擬准其入祀



崇祀鄉賢錄

已故江南淮徐揚海道朱善張浙江平湖縣附生少孤傭書養母先  
意承志喜讀書務求實用道光壬寅乍浦不靖請於邑令首倡義旅  
分布四門寇不敢犯是年邑大饑捐賑活人甚眾在軍撫循士卒嚴  
而有恩所向克捷任淮揚道三次嬰城固守旋帶兵克復清江浦發  
粟濟難民任淮徐道諭民堅壁清野賊無所掠平居以濟人利物爲  
懷鄉人避難北渡相依舉火者以百計其徙他邑者亦濟之至今人  
猶思焉公同查核該撫等請將朱善張入祀鄉賢祠之處係屬名實  
相副謹擬准其入祀

祭文

高均儒

維同治三年十月朔二十有吉日高均儒謹以清酌時羞之奠致祭於  
誥授資政大夫二品頂戴分巡淮徐揚海兵備道 追贈榮祿

大夫都察院右都御史朱公三兄之靈曰道光中紀夷犯浙始嘉郡  
濱海乍浦爲市浦隸平湖禦捍是圖公以諸生奮勵螭弧旣過外寇  
用善厥後由是敘庸筭績奏丞最南河時艱則那備兵籌勦淮揚  
委蛇育勇 錫號 國書優報咸豐十年江浙斃耗季弟常州殉著  
壯猶平湖淼淼遽淪於秋渡海漭瀆板輿就養慈庇所依室家無恙  
是公孝徵作忠之丞其次懋德謙示友朋信友獲上小心碩量三郡  
一州實除斯矧肇敏戎昭堅忍懲驕鄰圻靖捻捷書剪苗震驚疇昔  
今茲豫懌江介胥恬農歸有藉詎意沛團客民爭端公會鎮將平理

在寬大府合志麤官喜事岷岷何愚懇懇以孳鬱勃殫心疽發於瘕  
良醫莫覲徒咎圭鍼沛營星墜蹇蹇盡瘁慘慘劬勞知公遺懟軍無  
不前誰似其賢公歷傍傍二十五年東南否泰公覽交會官箴民瘼  
皆無纖暖卽與人交澂濁不淆荒如均儒且辱弁包均儒邁難頻翼  
大翰重聚淮壩益欣燕衍招余徐方敦學就將自反不縮負負曷償  
公蒙 帝祉篤祐孫子眾稱幸哉式穀有似其似云何五緘五紵澤  
以詩書維勤切磋余曾宿諾敢忘爲錯攻玉存瑜永矢誠鑿愴憶春  
初卻埽軒除晨餐執手黯然躊躇一別生死酌醴陳几神其來歆信  
鑒頑曷尙饗

墓表

宗稷辰



同治三年八月乙酉 贈右都御史故淮徐揚海兵備道山泉朱君  
以捕治湖團奮匪憂瘁病疽報入 朝廷念其有功揚徐勤事以沒  
甚閔惜之 卹蔭至優是年冬移殯於淮明年將歸浙中先兆其孤  
之柩等以狀來稱遺命請余表其墓君諱善張字子弓山泉其號也  
系出發源自其曾祖孝義先生始居平湖高曾祖皆以君世父侍郎  
諱爲弼 封贈一品君考諱爲霖在庠校有聲爲阮文達公所賞官  
終贛令君承家世樸學力兼經義治事早孤善事母友教其第六人  
值海上不靖乍浦告陷集義旅守鄉邑估舶不敢犯大吏遂委以浙  
西善後事事葺南河通判進同知道光二十六年補倅桃南署豐  
北邳北移中河咸豐初粵寇入江日理防務三年勦幅匪于海流擒

黃大虎等四十餘名以功 賞花翎又獲黃河口匪徒加優敘明年  
陞裏河同知屢擊擒匪 命卽補道員以籌防勞加鹽運使銜禦擒  
首張漕于浮山使水軍潛伏臨淮焚其舟三十餘賊駭多沉溺又郤  
之小溪逾月寇復陷揚州亡何入天長犯蔣壩君馳往拒之隔河轟  
殪巨酋遂渡河追殺三十里事聞嘉獎 賞庫木勒濟特依巴圖魯  
勇號譯 國語謂能卽以兵馬截分大隊云爾也嗣署淮揚道駐揚  
撫綏凋敝民漸望治九年四月僞英王四眼狗自六合儀徵撲揚郡  
亟選礮分四門爲備賊遽環薄欲斷糧道君以巨礮斃賊目十餘鏖  
戰半日狗眾駭曰紙糊城如此難破耶于是退爲營壘圍久困會天  
雷雨衝賊壘皆頽乘勢連擊之賊大潰旣而兩提軍來援登堞樓晝

策復破之於七里店追至儀徵以西留屯益嚴密賊由是畏沮揚民以安當事者一切委任之因捐資餉軍 賜二品冠頂尋授淮揚道運秋冬間賊益眾聯營至司徒廟亘百餘里四眼狗自將爲長圍晝夜守陴激厲將士多所擒斬賊始漸退同治元年春捻逆入清江浦復擊郤之卽駐浦計善後剋置圩寨又勦西捻大股出力初攝淮揚道未幾改併爲淮徐揚海兵備理徐州糧臺念民多失所兵又苦飢馳赴宿州與黃提軍開榜樽節振濟以堅壁清野辦賊時僧邸大軍使圖孫疇老巢君率圩練以從破之於棗溝斬馘數千二年漕河平孫疇亦克檄君襄徐宿軍務益以消未形之患爲急是時降練苗沛林叛據下蔡再陷壽州圍蒙城蒙餉絕輸之粟餘黨竄徐入湖團



迭派裨將斬禽之脅從者釋之君既領淮徐一軍僧邸帥諸將來會  
勦又以劉佐廷爲後勁苗逆誅餘敗奔而徐方以安戎事少息更清  
案牘興教化日以小學誨士風尙爲之一新蓋其盡力於撥亂反治  
者其功最如此而黨惡入湖團患未已也先是咸豐中議招流民開  
墾微山湖淤丈量之輸租濟餉人日聚而爭利亡命多匿跡其團聯  
絡百數十里自沛至魚臺湖口以數萬計君先請設官分轄未定而  
新團匪醜仇沛人殺傷過當令交逞凶者予自新狡不實獻三年七  
月會營勦之破兩圩勦泊千人未卽馴伏而沛人控愬不休君憂其  
急之則覺速任之則患滋驅除難感化尤不易肝鬱結而成毒然密  
畫啓陳力疾不已得吳漕帥循舊之 奏而喜可止殺深慰本心無

如積瘁鉅創竟潰裂而不能起也八月望疾甚時起坐飲藥自謂以死勤事庶得爲完人猶誦陽明先生身可益民寧論屈心存經國未全灰之句年僅五十有九其遺恨以國事未盡平治民生未盡綏和爲念而有母老年未能終養第輩盡忠盡瘁代子職者惟屬諸孤痛可知也君有貞廉之操寬裕之度損衣節食不忘爲秀才時其濟人忘已任事忘身皆發乎性真無所勉強以文吏治軍旅枕戈十年可謂能立王功活生人者矣君昔年在京邸嗜余文近始移書訂交卒未得面盡懷抱以故人梅伯言邵位西皆逝至屬身後之文於余余何忍辭耶君旣游 贈至大卿可傳於國史故敘其在行事狀不以顧文體從略云君考累被 恩贈榮祿大夫妣氏陸母氏蔡 贈封

皆一品夫人配范夫人前卒生之枏兩淮運判側室趙恭人生之櫟  
江蘇同知 賞花翎戴恭人生之樾候選主事王安人生之柱候選  
通判女八人孫三人

墓誌銘

錢振倫

公諱善張字子弓山泉其號也系出婺源自其本生曾祖孝義先生  
始居平湖高曾祖皆以公世父官 封贈一品世所稱椒堂先生也  
考爲霖有聲庠序爲阮文達高第官終贛縣知縣前妣氏陸母氏蔡  
並以公貴公孺染家學早孤善事母友教其第六人值彝陷乍浦以  
諸生率義旅守鄉里起家南河通判進同知道光二十六年補桃南  
通判署豐北邳北調中河咸豐五年升裏河同知卽補道員九年除



淮揚道未幾改弁爲淮徐揚海兵備道遂眞補而終於任咸豐以後  
粵逆與捻匪分擾於江北之境而奸民亦乘時起故敗歷諸職而時  
在行間自粵寇入江卽理防務三年勦幅匪于海沅殲渠獲黨 賞  
花翎又勦黃河海口洋匪得優敘七年擒寇已熾勦辦得力 賞加  
鹽運使銜旋禦擒首張瀍於浮山使水軍潛伏臨淮焚其舟又卻之  
小溪及揚城再陷髮逆陷天長撲蔣壩公馳往拒之殪其酋 賞庫  
木勒濟特依巴圖魯名號蓋異數也九年四月僞英王四眼狗撲揚  
州公方駐揚 值礮四門爲備賊環撲欲斷糧道公以巨礮擊斃賊  
目十餘人賊駭曰紙糊城如此難破耶遂堅壘爲久計會天雷雨毀  
其壘因擊潰之旣而援師弁集敗賊於七里店追至儀徵以西揚民

以安復以損資餉軍 賞二品頂戴秋冬間賊屠至聯營至司徒廟  
亘百餘里公晝夜守陴率厲將士多所斬獲賊始退蓋禦粵寇以保  
揚者如此十年擒匪陷清江浦公統師克之遂駐浦創築圩寨爲善  
後計同治紀元莅任徐州兼辦糧臺用堅壁清野法僧邸圖攻孫疇  
老巢公率圩練以從破之于棗溝斬馘數千旋獲蕘事二年降練苗  
沛林據下蔡叛再陷壽州圍蒙城時公會辦徐宿軍務知蒙城餉絕  
輸粟助之餘黨竄入湖團迭派裨將斬擒之脅從者釋之鄉營大集  
復派隊爲後勁已而苗逆伏誅徐方以安得 旨優敘蓋禦擒匪以  
保徐者又如此未幾湖團之患起矣湖團者始議招流民開微山湖  
淤自沛至魚臺戶數萬爭利亡命頗匿跡其中會新團奮匪殺掠沛

縣劉寨民圩三年七月會營勦之未竟而滯人愬不已公以急之費  
速緩之患滋憂憤傷肝疽發而裂八月十七日子時奄捐館舍春秋  
五十有九歿之前夕猶誦陽明身可益民寧論屈心存經國未全灰  
之句聞者傷之漕督吳公棠先檄勦辦公密畫啓陳力疾不已並據  
以上聞 恩贈右都御史 賜祭葬廕一子知州鳴呼榮已公至性  
誠篤沒不忘親善屬文前後校刊家集甚夥自餘政績不備書配范  
夫人前卒生之楫兩淮運判側室趙恭人生之榛江蘇同知 賞花  
翎戴恭人生之樾候選主事王安人生之柱候選通判女八孫三之  
楫等於同治四年十二月奉公柩葬於故里之徐埭以振倫與公從  
兄善驥爲同年且舊史氏也乞爲文謹據狀詮次而系以銘曰



事親孝移於忠鎮維揚障徐僮死勤事憂羣凶帝憫焉贈秩崇  
邈故鄉刼初終銘諸石奠幽宮

先總憲府君石室記

邑之東十二里有市曰徐埭迹埭之東稻田彌望得地十七畝先公  
賜塋營焉地勢宏敞乍浦九峰拱其南有水自丙繞海鹽來至塋  
東會龍橋與邑西來之水同源天目山分流而匯於橋下自橋而外  
迤邐入於浦江橋內之水復析焉沿塋東而紆迴於北西則分庚水  
以抱之艤舟塋前水埠直詣拜壇約六七十步左有隙地可建石室  
以奠神主同治甲戌春重謀於伯兄之柨中冬始築三楹後爲軒廣  
如其數直半之前後緣以短垣庭環以廊廊置墓表近墓門折而東

先正文記  
十餘步又折而北爲甬道夾道植梅百本餘四十步而達於室門之  
榛羈迹吳下不獲身董其役稽古大夫立廟表彰軌範載諸銘器將  
營於城中以尊典祀石室爲風雨展拜之所間於廟制今訖工於光  
緒元年正月諏吉二月乙未命第之樾之柱隨伯兄設幄迎神致饗  
於室精爽用馮永昭底謐嗚呼先公卽世勿勿星周松楸漸長展禮  
失時仰思遺澤悒不成聲痛維事功行誼具於 國史垂於家乘明  
示來禩足爲世則子子孫孫有不自力於庸行以玷舊德其不能立  
於今之世矣我昆弟子姓共事刻勵以無負先訓云男之榛謹識

先總憲府君祠堂義田記

王制大夫三廟祭必有圭田漢儒謂有始祖廟者無王考廟法疑未

安自宋程子定議士大夫之族得祭其高曾合之三廟始祖一昭一穆五代以序我朝準以定禮本乎經順乎情錫類推恩何其廣而大也夫祿田之制行仕於朝者祭器有設粢盛有供賦入所餘以之展親而仁族旣其廢下無以吉蠲貧而不逮薦而不祭甚又不及菽水以致敬欲有所整齊周給厥道無由雖然禮時爲大順次之宜次之蓋古今之不相襲也久矣昔先公志乎是嘗訓之榛昆弟曰我朱氏遷浙近二百年世德列志乘族日益繁懼無財以聚奉時祀申其教養貽前人羞留此爲敬宗收族之資汝曹體我志其毋墜焉遭時多艱未遑將事有美勿述厥戚在躬爰與兄之枻弟之槩之柱錄遺產建祠祀上請於朝力微地儉而禮徵諸典前室先公神主後室



始祖先公之高曾祖禰

以伯祖官漕督先公晉都御史累贈光祿大夫

階戶儀位無僭無闕

躋堂而薦合族而飲春秋饌饗之有頌吉凶同患之有卹彬彬勛帥期於不匱之榛益慨然纘承之惟人吾先公之欲濟斯舉造自吳中范氏顧則而倣之者眾能歷久不渝名可並稱百不一二數然後知徒善徒法之不足恃而祖宗德業垂裕意亦有時而湮爲人後食其澤不思所以濟濟繩繩而不再世餒焉爲鄉里笑夫豈纘承勿替之道也乎是故望斯祠之長新祭而不闕教而不衰養而不廢以施於無窮也吾昆弟異時子若孫敢不永言廣敬以身先之或轉視爲無恐則貽前人羞者又不在族子姓嗚呼創難矣守詎易言教忠教孝教悌禮之大經百王所不易若夫時有損益制有豐嗇從順從宜無

悖今日謀始之義尙賴族中賢明繼起同體此懷擴而充之其祠屋  
禮器田數及冠婚喪祭一秉先命具於條規云男之榛謹識





敬吾心室識篆圖序

李宗昉

漢書藝文志書有六體曰古文奇字篆書隸書繆篆蟲書是古文與奇字且各爲一體也若彝器銘文則漢代惟張敞能識之辨美陽古鼎銘是也然郊祀志所載鼎文甚順適廼史家刪飾爲之可知本文亦不能盡讀後漢揚雄好古文奇字惜未見彝器銘耳宋歐陽修獨求金石刻文維時劉敞安撫永興軍搜羅彝器得十有一事能辨其文者以楊南仲爲最見集古錄甚詳後宣和作博古圖以官書未免譌謬然釋文亦本楊氏洎王俅嘯堂集古錄薛尚功鍾鼎款識間有辨証要不若楊氏之明瞻余於甲午歲獲漢光和量暨彝器五種又數年始屬朱生建卿拓其銘文爲之注釋建卿禾中人同年茶堂先

生嗣子也稟承庭訓學有淵源而金石文字於楊薛諸家及呂大防  
王復齋所論定近世吳侃叔錢獻之江秋史侍御暨儀徵阮相國所  
蒐輯均一一能悉其流傳遇古文奇字人不能盡讀之文輒援經立  
解互證不窮其家舊有敬吾心室萃古器數百事著爲款識余未能  
徧觀也因以尊人所論余家之綦父鼎立戈形乃作器敦參以生所  
論述間附臆說分注於各搨之末而統記前後事蹟於簡端以爲寒  
夜擁爐清話之一助云爾

敬吾心室識篆圖後識

世父國教公承家學篤嗜吉金文字載李氏遇孫金石學錄侍遊京  
師搜羅彝器搨本積久成帙顏所居曰敬吾心室戴文節爲作識篆

圖之榛齒尙穉及長而壯檢點公之遺墨初不知公之有是圖有是輯焉歲在丙午謹將侍郎公審定積古齋鐘鼎款識稿本付諸石印溷陽尙書觀石印稿本詔之榛曰曩在廠肆獲敬吾心室識篆圖之榛懵然莫對乃出示爲之狂喜心欲假歸同付石印囁嚅未吐逾年八月復至白下始申其請尙書慨然許之諦視首頁爲阮文達題字次則圖再次則各敘言其搨本商周秦漢四代之器凡三百六十有四以類相次盤鐘洗鼎尊敦簋甗甗盃匜壺彝觶爵卣爲類者十六漢器別出鼎鐘及鬲爲類者三原搨題記間用五色筆石印難分概從墨四閱月而工竣尙書嘗謂器之散在四方幾經劫火日見其少就此搨本已爲近世所不易觀之榛從事校勘喟世父心力所寓存



於今者止此雖詮釋之文不逮款識稿本之詳贍然非賴尙書好古  
識奇什襲珍護則此冊不知流落何所烏從得假而石印復顯於世  
今附款識稿本以傳豈不大幸則之榛之寶而增感更入肺腑矣世  
父助教胃監歷二十餘年生平著述僅存詩一卷列入新安先集咏  
古器諸作尤爲時所推重之榛秉質過鈍讀書無成服官無狀而考  
據禮之器數儀節又未克世其學每憶童時公告我父總憲府君此  
子在羣從中具至性察其言動他日或可繼業孰意歲月蹉跎本末  
俱失重展手澤追維往語不禁自訟自懟也光緒戊申六月姪之榛

謹識

平湖縣志列傳

朱善驥字子良漕運總督爲弼子道光乙未順天舉人選山東濰嶺場鹽大使秩滿陞福建順昌縣知縣縣多盜設法散其黨捕爲首者誅之盜風熄旋升馬家巷通判大吏重其才留之省歷署閩縣侯官等縣知縣調福州府海防同知獲艇匪海氛以靖旋卒於官平生好論文雖任繁劇每試必親自校閱故所得皆知名士子之穀字稼生福建候補通判精勤幹練署連江縣有政聲總督左宗棠統師入閩飭襄營務旋署南靖兵燹之餘差徭絡繹之穀請由官酌撥及界而止兵勇有不遵者嚴懲之民得稍息營中有携帶婦女者之穀言於統兵藩司王德榜按營搜剔遂回原籍婦女賴以保全以積勞卒於

官年僅二十九

謹按府志所載省齋公至仲嘉公三世列傳錄乾隆季年知府伊  
公湯安所纂本侍郎公及先府君各傳則錄同治初年知府許公  
瑤光新輯本彭侯潤章所纂縣志多率純抄府志概勿錄庶免複  
沓錄府志所闕者聊以備考之榛謹注



國史忠義傳

朱善寶浙江平湖縣人胞伯爲弼原任漕運總督胞兄善張原任淮  
徐揚海道 國史均有傳善寶由監生報捐州同咸豐四年投効江  
南軍營勦辦海洋股匪出力敘功 賞加知州銜旋捐升通判 命  
發江蘇試用七年捻匪大股擾江皖犯徐州善寶奉檄帶兵攻勦迭  
在清江安徽等處接仗殲斃逆匪多名河督庚長上其功 命免補  
本班仍留江蘇以同知歸候補班儘先補用八年署江甯府南捕通  
判十年三月署督糧同知是時金陵大營兵潰粵逆竄擾常州戒嚴  
善寶奉派總巡常州府城廂地方四月逆匪攻撲郡城善寶督率民  
練晝夜登陣守禦轟斃賊匪無數賊攻益力眾寡不敵城遂陷善寶

獨奮勇巷戰賊眾磨至攢矛刺之身被數十創猶以手搏擊遂於青果巷力竭陣亡同治二年署漕運總督吳棠奏 聞 命交部議卹尋 賜卹如例 恩給雲騎尉世職子之模候選知州承襲

江南昭忠錄列傳

朱善寶字楚卿浙江平湖人官江甯南捕通判咸豐十年三月署江甯督糧同知僑駐常州時句容溧水先後陷賊當道棄城南走善寶嘆曰毘陵爲蘇浙門戶毘陵不守則蘇浙瓦解矣我雖無守土之責義當與城存亡也遂勵眾登陴拒戰殺賊以千計四月五日賊攻益急善寶知事不可爲是夜賦詩云狂風已斷悲筇曲落日空揮寶劍光惟有丹心終不改猶能殺賊死戎行明日城陷戰於青果巷身被

十餘創遂遇害幕客徐小庭家丁王福馮升皆死焉



Blank manuscript area with vertical columns.

皇清誥授光祿大夫江南淮揚海河務兵備道朱君神道碑銘

侍講銜翰林院檢討湘潭王闔運撰文

前陸軍部侍郎都察院副都御史河南巡撫海陽吳重熹篆額  
日講起居注官翰林院侍讀學士大興惲毓鼎書

君諱之榛字竹石其先歙人也有唐天祐中茶院使朱瓌來戍婺源  
定居潭村曾祖鴻猷遷於平湖遂爲縣人焉家世貴顯父諱善張官  
淮徐揚海兵備道守城卹功贈右都御史蔭一子一品蔭生君承其  
澤以同知分江蘇當圍城時父命奉祖母還浙君泫然曰願隨配昭  
忠祠父悚然異之年未弱冠不事章句博通經子輒從名人質問其  
時江淮間人有魯通甫丁儉卿梅伯言皆崇論閎議俗儒驚怖君闕

憤講論曾無充詘既仕且學遂有名字多見通人簡然不汙于時以  
闕闕門望補蘇州總捕同知積海運勞累擢道員留江蘇補用 賞  
二品頂戴以道員遇缺題奏自茲三十一年參佐兩司見重督撫前  
後十七特薦再署藩司十二署臬居則總理釐局專飭財政纖悉利  
弊如指諸掌日對百客諳其才性每察吏初謁竝與禮接聞疏能否  
門無棄材院司銓衡莫能相尙政俗興革悉以咨之賓客輻湊彌自  
謙抑權傾省臺不遭媚忌前後巡撫造門禮請君壯病日省早懷引  
退及譽望隆盛恒冀實補然後自陳故相剛公前來撫蘇盛威陵厲  
尤覈財用以爲歲入鉅萬半歸中飽君抗對曰職所司者蘇釐稅銀  
歲二百萬半之亦百萬歷歲二紀過千萬矣飽而不賜恐無此理剛



公失對四坐愕然既乃倚任愈隆遂相推重然久專利權眾多缺望  
臺論齟齬並劾疆臣特 詔學使繕其留去奏以目疾宜休特奉  
中旨命總督覆奏劉忠誠昌言其清介持正爲當世有用之材自是  
中外訥定雖盲無害其先甘督譚公以目疾請告 詔聽臥治從政  
之員唯君而已既而奏請清賦君專其事藩司懼而求去惟君不回  
期月事竣歲增入銀米三十餘萬 特賞頭品頂戴光緒三十有三  
年奏補淮揚海道先公所涖民吏猶存望閣趨庭升堂卻席督撫貪  
其維繫奏署蘇藩新令既頒俾總財政菁華竭矣始願亦酬粵以宣  
統元年三月癸亥卒于公館年七十是年十二月子景邁歸葬平湖  
徐埭鄉之原國喪才吏時淪雅道海內名士同聲歎傷惟君執于從

政尤修內行文史足用博通冥解雖患目疾機悟絕倫所著芻言陳  
言蠡說各數十篇及詩文集並裨世用歷任公牘別刊行世又表章  
先伯祖右甫侍郎金石之學及先師高陶堂遺集皆寶書祕笈因君  
而顯三十無子以兒子景行爲嗣四十一生子景邁景行早逝有子  
運啟爲傳重嫡孫夫人同縣干氏先君卒秀水沈氏撫育孫曾仰懷  
先烈是用伐石靈巖昭睹來葉其銘曰

昔有忠文承緒延熹於顯朱甫復光于時幼稟壯節投命見危峨峨  
豸冠克耀江淮十二陳臬吳民畏懷前後繡斧坐嘯清寧 帝俾績  
服開府淮陰不懈于位亦靡所歆懷藻含文而蕙厥靈美必有終休  
茲刻銘

清故光祿大夫頭品頂戴江南淮揚海河務兵備道署江蘇布政使  
朱公墓誌銘

門下士長洲葉昌熾撰文

門下士長洲章鈺書丹

屬吏安吉吳俊卿篆蓋

嗚呼世教淪胥湯湯方割官常國紀蕩無法守世有彊立不反之君  
子出而措危定傾理芴濟劇勝任愉快吏民交頌此固不世出之才  
矣若有豈弟樂只之君子出而發蒙傾否距詖息邪登崇備良修明  
術藝百世而下實攸賴之豈僅三年蓄艾十年樹木已乎世難未夷  
哲人遽賈芻皇採時之才惻愴論學之簡蓋於吾師竹石先生重有



慨焉先生姓朱氏諱之榛字仲蕃竹石其號先世唐制茶院使瓌始  
居歙高祖諱履端 本朝乾隆壬戌進士由翰林改官兵部職方司  
郎中本生高祖諱英曾祖諱鴻猷爲悌弟爲孝子兩世至行艱苦卓  
絕積善燾後卜世滋大始遷浙占平湖籍祖爲霖攝江西贛縣事妣  
陸氏蔡氏父善張江南淮徐揚海兵備道以禦賊功 贈都察院右  
都御史妣范氏先生生妣趙氏自職方以下皆以總憲公貴 封考  
妣如例總憲公四子先生其仲也生聰穎有至性少受業於秀水高  
先生伯平讀書觀大略不沾沾章句上元梅伯言山陽丁儉卿魯通  
甫皆父執耆宿世父建卿先生爲茶堂侍郎子精於蒼雅金石之學  
先生小冠隅坐質疑送難諸先生驚嘆以爲非常童也咸豐己未寇

警在郊總憲公登陣誓守命長子奉母歸先生泣然請留詰之則以  
童汪錡對嗟乎先生忘身爲國以死勤事之志固已定於此矣同治  
丁卯以蔭釋褐補蘇州府總捕同知叙海運勞保以道員遇缺題奏  
賞二品頂戴自是先生宦躅垂四十年不出吳下先後權臬之

命至十二下兩攝藩條一視關庾剛明廉肅能勤其官而尤以筦蘇  
滙釐務爲最久自中興創釐捐以贍軍食東南底定沿而未革掎克  
則商病侵蝕則國病上下交征狙商猾吏因緣爲市則國與民交病  
先生整躬率屬精心稽核清操亮節吏畏而民懷之己亥奉委清理  
田賦歲增米十五萬石丁銀二十一萬兩 特旨賞頭品頂戴異數  
也先生謂此皆出中飽之囊以還司農非累吾民遑恤勞怨治賦以

此治釐亦以此如皋瀕江邑地僻而民健有訟婦弑夫者縣讞上先生閱其詞鍛鍊檄下通州覆訊得平反嘗謂人命至重每下車慮因訴牒填委亭疑閱實燭照觸解嘆喑老吏莫敢舞文曾忠襄督兩江時條上保甲法忠襄大驚服示僚吏曰此命世才也其後張文襄劉忠誠皆嚴重先生不視爲屬吏而不逞之徒惡其害已亦有摭拾流言以上聞者文襄忠誠先後疏辨 詔勿問先生感激馳驅益自濯厲庚子海警列城戒嚴縣囚謀脫械叛內外鈎結旦夕蠢動未發而先生知有變亟白撫軍出情實者於市駢誅之事大定是役也人謂搯刀立斷閒不容髮而不知先生不大聲色哀矜詳慎未嘗妄戮一人也政有興革事有緩急大府籌策未嘗不造先生咨訪而先生雅



不欲以吏才自見論治務在正人心培元氣慨國論之昌披悼聖文  
之堙鬱會長沙中丞喟然興學謀於先生做文襄湖北之制建存古  
學堂以教士先生手定條教江南北高材生羸糧景從彬彬鄒魯矣  
客冬部視學蒞蘇考校殿最列上第一周覽橫舍咨嗟太息而去而  
先生已不及見矣先生中年以後卽患目眚安於義命壯歲服官皓  
首始補淮揚海道聞 命慨然曰此先人舊治也邦之父老猶有存  
者庸敢弗勉未赴淮以宣統元年己酉三月十四日卒於蘇州官舍  
距生於道光庚子年七十德配千繼配沈皆 封一品夫人先生以  
千夫人未有子撫兄子景行爲嗣先卒其後崔淑人生子景邁先生  
喜甚字之曰象甫志象賢也女五孫運啟運敷景行出運鵬運守景

邁出早殤曾孫家玉家德象甫奉靈櫬將歸葬於新阡來謁銘昌熾  
受知在舉子時顧自家居以至通籍未嘗一謁門牆隴首奉使歸辱  
先生下交始以士相見禮謁先生於講堂攷德問業未逾兩稔遽執  
簡而銘先生之墓能不悲夫先生敦尚道義篤於事親孝友睦嫻任  
恤之誼不可備書謹論列其訃謨願畫關於民生國計與夫紹先聖  
開來學正誼明道之風烈援据事狀排纘書之自先生捐館長沙南  
皮兩公先後薨逝天不憖遺鑄砥柱而去之撫衡流之方羊懼斯文  
之安託俯仰寧涕而爲銘曰

滄浪之清兮水可濯纓廣廈崢嶸兮中卷在庭前有樂園後有考亭  
清獻學統鄉邦典型夫豈僅精彊慈惠如唐之劉晏陽城美哉堂斧

公靈式憑瞻松楨兮鬱鬱尙高山兮景行精廬來學其視此銘





叔弟梅石傳略

我弟名之樾號梅石先總憲府君三子也生而誠篤口訥心敏同治甲子歲八月先公勞歿行間櫬還彭城弟迎謁哀號屏輦茹素發於自然見者奇其不類童齒之榛念弟具至性端賴名師訓迪成器延陸松坪先生授經課畢講解朱子小學頗有會心亡何陸卒弟歎不幸而失名師迨余佐郡吳門弟年漸長母命來蘇讀書之榛秉彝訓教子弟不徒以文詞相助首正志趣大本既立而後所習爲有用之學歲乙亥述先公之命建莊贍祭謀於伯兄不能決謀於弟弟曰遺祿資溫飽餘與族共之則先公厚視同支之義伸矣兄不力任勢將誰屬怵弟斯語議廼定彼年未冠識斷已如此奉侍我母能先意承

志博歡心母雅慈愛而訓誡不倦弟頻飲友朋家醉歸晏起母曰人生在勤游惰如何立業試思爾父爾兄曾有嗜飲晏起者乎汝長矣宜我言之不汝從弟惴惴不安者累日我母高年猶勤操作弟見輒諫沮甲申冬母忽咯血佐余奉湯藥曲盡溫清之道一日夜過半聞庭中似有聲呼問不應燭之則弟爲母跪禱母謂之榛曰爾心粗事我不逮乃觀心細乃觀弟乳名也弟澹於進取須一第入官免以貲郎見誚故學之未成願家居不慕時榮余厄於目疾拙爲時効爰求歸養適性相與論天下之至樂惟天倫爲最真老人康娛門庭雍穆聯吟一室陶寫襟抱誥兒輩循禮法刻勵誦讀守先人之清芬此樂却不易邁我兄弟敦睦獲之用是欲歸弟曰洵然然兒年方壯宜思



濟濟繩繩弗替先志苟宅心愛物則居官之力逾於居家歲己卯歸而再出者弟之勸也弟睹余權臬治官書少假借徐曰兄任事太果嫉惡太嚴祇徇公家罔徇流俗將來悠悠之口構讒騰謗使兄坐此忤時寧毋悔余曰內疚無忝用舍命也弟又引壯夫二卦辨明君子之用剛藉和以濟旋捧案硯請銘銘曰磨不磷方且直潤色無時長保茲質弟度余終不省其言久之探囊錢質問錢形余曰周官稱錢爲圜圜者圓也圓纔適用弟復問曰何以錢孔不同圓而又方答曰古人制錢之意有深義在流行至今而不改者以其外圓而內方也弟大笑曰然則兄固知之矣始悟假錢諷諭圖補我闕無微不至也弟外和內介義所不可屹不爲動弟婦稔弟非我母出欲懈事姑之

禮憚家之父兄讓虧婦道又嗾余久宦無成減弟之產屢聳析居至  
於詬誅弟曰爾言縱是我有不可行者二况未必是耶我生九月而  
喪生母育於我母五歲痘瀕危母豢之不以我爲厭棄既就塾或逃  
學母誨之不以我爲不肖長而一再娶勞母經營不以我爲煩惱其  
他寒暖飲食隨時煦嫗過於所生是母恩之不可背也我三歲母挈  
歸里次年避兵訛傳寇至兄負我狂馳阡陌仆而起再馳我猶啼饑  
乞餅食我乳母之子奪我物推我於地兄怒擊乳母反噬兄月幾脫  
心欲助兄恨力不勝泊長叩先世懿行古今理亂得失兄口講指畫  
不嫌三反必欲納我於賢人君子之域是兄義之不可忘也婦計說  
之不行後不復道弟告人曰我總不惑牀第之言自衰其孝弟之行

鄉黨聞而重之今年五月弟奉我母歸里消夏七月復來視余留數日詎意兄弟相對此爲永訣時耶弟好周急潛出巨資振晉豫自匿姓名交無町畦從不談人之過人或狎侮亦不與校遇祠祀齋潔恭敬竊以幼年悲岵先公容貌約略記憶歲時懸挂瞻仰不忍去因先公有言爾之視季當如仲之視爾常慮季弟體孱晤卽諳勉保養自恃體強相者指豐下爲壽徵遂乖慎節調衛九月癸酉偶觸時邪越二日乙亥疾篤家人恐懼奔告我母我母臨視弟呼母如平日五更天寒老人請歸臥莫聽謊報兒病由汗退尋自愈母呼余妻往視聲於邑而神變須臾氣絕驚電飛傳肝腸摧裂上慰高堂下撫弱息愴懷同氣情曷能堪嗚呼天下從無行善修德不獲報轉天折如我弟



彼蒼蒼者尙可以理測耶弟之孝于親友于兄胥根乎性天非有所  
矯飾邀譽也澆漓之俗目以爲愚不知愚之不可及乃天性之至者  
也余嘗慨古哲孝友之風不恒見於今日與弟處三十一年但覺準  
乎矩矱不甚爲異今復按諸書傳若我弟所爲彷彿有之遠近聞弟  
之歿靡不咨嗟太息而余忽忽待弟多疏則此心之綴安得而不痛  
哉初弟規余卞急致目眚難瘳愛兄之極憂形於色爲訪醫藥殆遍  
得一方必詳考以進蓋冀我目光漸復奮於事功余修名未建年迫  
始衰曩可混迹冗僚而不歸者家事付弟今弟歿不歸胡寄歸而踐  
天倫之樂獨聯吟闕如追維言行大有可紀每一操管流涕而止今  
舉殯有期不爲撰次則二孤又穉將湮沒而無傳第我弟名未通於

朝籍私家不宜立傳傳其略以列家乘垂詔來禩俾我子姓喻我兄弟之友愛同居同財而無間怡怡興感克肖厥德庶幾稍釋我母之痛而二孤之以教以養底於成立皆余之責余或情生歧視厚已子薄二孤他日亦無顏見弟於地下書至此又不禁涕泗之盈頰矣弟聘徐氏娶許氏有淑行生子景繩繼娶汪氏生女蓮娣汪歿納妾沈氏生子景述兄之榛撰

書後

傅懷祖

右竹石廉訪撰次哲弟梅石部郎傳略樸茂真切令讀者孝弟之思油然而生洵可貴也然懷祖辱交久見聞所及尙有一二事可風薄俗謹補綴於後昔金行東遷中原士俗多流寓江左王謝爲盛其子

第亦清修自好或一觴一詠風流相尙或才流經通揮麈卻敵至今有餘榮焉故當時貴游子弟不聞有與人事通賓客者迨唐末而令狐綯之子滈以招權納賄聞矣以後雖強執若王雱亦不免世詬識者於此觀世變也廉訪曩歲三權臬篆故鄉戚友接踵而至賓客填門君不問官事不見一客惟日侍太夫人左右或靜坐一室不爲世俗寒熱豈非謝庭芝蘭乎且宅心仁厚嘗奉太夫人往來吳中見塘路傾圯入水行人病涉失足而斃數數有之君惻然動容言諸廉訪請於新鄉中丞丙戌暮春興役增卑培薄歷三月工畢上起覓渡橋下迄浙之王江涇綿亘百三十里頓還舊坦行者稱便驗此足明仁人一言之利彼蒼夢夢少年埋玉宜廉訪追悼不已言及之未嘗不



雪涕漣洳也

謹按侍郎公創立遷浙支譜未遷以前專載本支遷浙以後乃及  
旁治始祖茶院公四世祖文秀公家傳照舊譜敬錄重本支也不  
錄九世從祖徽國文公宋史列傳者旁治也十四世祖提舉公兄  
弟四人成進士者三一門孝友宋代褒旌弟明州公亦載元史孝  
友傳專錄提舉公體例然也自提舉公隱居顏公山累世耕讀潛  
修勿耀二十四世振宇公樂京口江山之勝葬於丹徒之白兔山  
二十五世就之公之弟聞若公道聖辛苦賊中脫兒於難載於休  
甯縣志雖在旁治弗錄之列而孝友相傳可知淵源之所由來矣  
二十六世東皋公昆弟首以書畫爲時推重見丹陽縣志流寓傳

二十七世省齋公遷浙以後始晰旁治或以詩名或以經術著或以政績顯或以孝友忠義稱或載國史或載郡縣志代不乏人其他墓志墓表與夫敘言記贊依次附列名曰傳志錄俾後人讀之毋忘舊德之榛謹誌

朱氏支譜卷六

茶院三十二世孫之榛編輯三十三世孫景邁增補

祖訓六則

世祿之家鮮克由禮是吾憂也教家之道敬祖宗爲本敬祖宗在修祭法祭法立則家禮行家禮行則百事舉其或數典忘祖粢盛闕供則不孝莫大乎是

孝衰於妻子天下未有不正其妻而能正其子者治家嚴肅必自內始孩提之童無不知愛其親及其長無不知敬其兄可見愛親敬長是天性中事凡做好人自大賢以下皆帶兩分愚字至於忠臣孝子貞婦義士尤非乖巧做得苦心孤詣自有成就



先民言行  
書不記熟讀可記義不精細思可精惟志不立實是無著力處  
讀書非望早貴求其明理務其大者遠者少年宜使苦苦則志  
定切莫做識得破忍不過的事行有不獲反求諸己用人當用  
其所長教人當教其所短致身則盡瘁敦本則崇基顯晦有時  
夷險一節要言之士先志

勤與儉治生之道也勤以補拙儉以養廉晏眠早起量入爲出  
昉古人月計歲計之法若浪費而不知節以致財匱稱貸恥字  
何在人一無恥如病閉喉不可救藥行止喪家聲墜生理絕矣  
試看人家好氣象都從不晏起始

禮者人道之大防舍之無以爲家無以爲生世族大姓末流之

弊子弟類多悖禮傷化由於德不修學不講積德隨在可爲不  
必有待學問非有家傳必賴師承常存敬畏則善心自生君子  
改過而遷善小人恥過而遂非賢不肖之辨胥視乎此

古有宗約德業相勸過失相規患難相恤有無相共其教子弟  
多交一人不如少交一人多說一句不如少說一句言忠信行  
篤敬臨財知退臨難不苟砥名禮讓無忝所生日從事於斯而  
不忽則入德之方庶乎其近之矣

謹按先祖兄弟承生高祖藥房公面述彝訓爲立身行事之本厥後  
復採陳文恭公蒼萃嘉言衷於文正公語錄垂訓六則榛已錄  
於莊祠承婺堂屏門俾合族子姓登堂瞻對時加警心今續修

支譜謹刊前訓冠於誦芬錄閱者知淵源之有自來也戊申七月之榛謹注



東皋公畫竹

曾燠

吳中瞿氏東皋堂梅村祭酒歌慨慷不獨澆溪花竹荒石田翰墨皆  
散亡朱氏東皋獨好在百數十年藏舊畫孤莖聳出碧琅玕孫枝特  
有凌雲槩國初已來寫竹枝高手爭推魯得之諸昇王嶠相繼起筆  
法多從吳仲圭東皋妙在規矩外江上萬个皆我師娟娟作態露零  
後謾謾有聲風到時椒堂京兆重珍惜清節虛心傳世德人家貴有  
好兒孫榮落盛衰紛頃刻君不見王太常烟雲盡落他人手又不見  
蔣南沙花鳥今爲誰氏有何況靈岩山館在目前豪華遷變經幾年  
聞道林泉與碑板其孫祇賣數萬錢

又畫竹便面

陳鴻壽

予調客瀨上四年矣偶於市中得其先高祖東皋先生畫竹便面驚喜欲狂裝池成卷持以示余卽以畫論筆如屈鐵瘦勁入神不特先世之遺澤爲可寶貴也因檢春橋公吳門雜咏有云先祖曾居破楚門東皋舊宅已無存當年萬軸牙籤富嘗接周徐共討論自注先文林公會居閭門東皋草堂藏書甚富周爲忠介公子字子佩徐字昭法隱居天池山皆遺老也余世母爲先生曾孫女不辭誣諉爲子調題記如右食舊德而誦清芬子調其勉之哉嘉慶甲戌冬十有一月陳鴻壽敬書嗣世母後仲弟鴻豫同觀大男寶成侍

高日濬

墨竹自文蘇而後傳者絕少近日惟禾中籀石翁獨擅勝場與與古  
會理堂兄以所藏令高大父東皋先生畫竹便面見示展觀之下覺  
前輩風流穆然可仰更知籀翁之縱橫翰墨自有師承也嘉慶乙亥  
三月望日年家後學高日濬敬記

先高祖東皋公墨竹步韓文公新竹韻

爲弼

先人日舒嘯園林愜深閱落筆千琅玕墨花點蒼翠家藏昔有一今  
得三爲四家鉄臣水部劉時庵明經及聖占族第各見贈一幅高堂挺蔭濃花陰敢競媚節直  
能穿雲孫生有餘地誰言震无咎庶幾旅卽次春秋涼露霜斑斑獨  
揮淚後人尋根源詎作墨君視



赤壁二賦堂謁蘇文忠公像

昌緒

自公謫黃州名高未熄謗山水恣流連文章益奔放虛堂聊偃息臨軒時眺望赤壁倚江濱奇突不一狀載酒前後游與客互答唱揮毫兩賦成格調自特創雖非公大文氣亦見跌宕至今數百年誦讀家相尙我來值孟冬萬象含悽愴江山盡改觀陵谷幾消長二賦獨巋然軒楹恠石傍坐公於其中風流固無恙當時妬公者泯沒無與抗極目江濤生西風答悲壯

敬題先高叔祖赤壁二賦堂詩墨蹟

有序

爲弼

吾家舊藏先高叔祖續庵公手書赤壁二賦堂謁蘇文忠公像詩余幼時曾見之自先大夫卒所藏書畫多散佚此墨蹟

亦爲人携去嘉慶庚辰族子奎耀自嘉善購得之見鈐有先  
大夫印章卽以寄都祝余五十壽感同族之古誼念前模之  
難追謹次原韻并示奎耀

少賤困孤露動輒遭俗謗先澤隨烟雲誰歟追散放觥觥武昌守久  
樹我宗望文翰溢素縑譜系綴行狀赤壁景前賢臨江發浩唱墨古  
蹟猶新珠還見如創我今撓塵鞅偏仄疏宕明發念昔先索居渺  
好尙尺幅從南來感舊動悲愴鑒此千里心以我一日長烏鵲知奮  
飛樹枝絕依傍初衣惜未遂布帆想無恙風前誦清芬擊節聲自抗  
寄謝竹林賢吾衰尙心壯

先武昌太守書扇歌

并序

先高叔祖纘庵公工書家藏臨米董帖一冊手札一卷點畫古勁頃客遊武林有以斑竹扇來售者乃公爲臥庵先生臨米書背有王忘庵設色荷花價昂貧不能得感而賦此

見山樓空煙雲散遺墨雖存半零亂饑驅客遊來虎林乃見武昌之書扇欸爲臥庵尊叔酬落筆渴驥驅潛虬琅嬛書屋鉗小印印泥紅紫斑斑留琅嬛書屋爲先高叔祖藏書處憶昔荆襄領郡日幕府賓僚推第一赤壁

山前吹洞簫鄂王城畔題新墨歸去閒雲樂事饒弟兄卜築住東皋兄寫竹第書蕉竹如書法波磔古書如竹勢枝葉交白頭尋取對牀樂不知門外風蕭蕭百年人事滄桑改丹陽老屋依然在曾向烏衣問典型還從縑素思文采宗族飄零難聚頭扇乎幸得懶迂收楚弓



可令他人得趙璧能無善價求展來翰墨香猶古謝氏蒲葵重江左  
披拂清風習習來客窗拈筆聊摩撫族孫家計苦長貧典盡琴書剩  
一身欲留此扇愁無策淚滴湘江斑竹新

謹按丹陽縣舊志流厲傳載公順治初始遷丹陽居練溪以畫

竹名第昌緒

即武昌公

以書法名此幀公自題歲月癸酉仲冬迄今

已歷二百十六年伯祖侍郎公注得諸京口族人携至京師曾

賓谷齋政爲題長句又畫竹紈扇叔祖子調公

又號理堂

於嘉慶甲

戌歲得於瀨肆年久碎裂無可重裱祇錄陳高兩跋武昌公書  
法臨董一冊至今保存之榛於淮蘇兩地復獲公行楷兩帙東  
皋公畫竹則不多觀讀侍郎公題墨竹句有云家藏昔有一今

得三爲四共三幅不知散佚何處今藏止此而已侍郎公會見  
武昌公所書便面貧不能得長歌紀之仰見先世遺墨當日均  
珍貴如此凡爲後人能不倍加珍護之榛謹注

梅花書屋圖

謹按省齋公始由休甯月潭村遷浙桐鄉因外舅汪碧巢農部而  
占籍焉是圖署款京口沈銓不書歲月敬瞻公小像容貌年  
約三十許計其時則在康熙四十七八年間入都考職繫馬  
門外裝成待發正梅花盛開公坐榻上神采奕奕的係畫家  
名手圖後題句不下十數擷其詞之尤雅者列於錄來孫之  
榛謹注

潘之彪

陶公柴桑居黃華滿三徑君今性好梅泉石添幽興條風叩書幃襟  
袖寒香凝高士許爲朋名姝樂爲媵睇賞形神清早取羅浮勝一朝



遊京洛豪情逐鞭鐙中途訪茅舍允有言相贈寰宇樂昇平羣才別  
賢佞飛騰固壯行用舍由時定携圖索題句老腹空懸磬慮勞擊鉢  
催強作擦觚應雅知世澤長珍重冰雪瑩

吳之振

闌干六六抱迴廊插架圖書翰墨香疏影橫斜滿階下主人把卷自  
徜徉

鄴侯好古牙籤富水部吟詩官閣清颯爽英姿將北發檐前索笑盼  
成名

汪繼燦

寒香遶屋石平鋪吹起春風八畫圖久識郝隆淹博士藏書曾校豕

魚無

何須折寄隴頭春分得銅坑似錦茵  
郤羨君身有仙骨此行定作種  
花人

汪爲熹

丈夫縣弧矢有志在四方名園列嘉樹聊以寄相羊  
詩書盈几席豈其戀姬姜試看闌檻外僕馬儼成行  
非鮮別離情宵肯作徬徨一枝  
香氣遠葭葦誼更長

汪燿

相覲益相親訂交來結鄰香清穿鉄石畫裏見精神  
裘馬翩翩日琴書寂寂春馳驅如壯志莫使染埃塵

汪紹焯

客秋傾蓋便非新今夏重逢情更真別後相思如雨積披圖又算一番親

翩翩風度氣如春試馬征途踏軟塵轉瞬才高鞭穩着好聽捷報慰比鄰

表叔大京兆朱椒堂先生爲先高祖姑丈省齋公之曾孫也一日出示省齋公梅花書屋圖卷作圖歲月約在康熙間及今百數十年矣新裝完好舊題甚夥展卷敬讀其在前所題兩絕句則先高祖給諫恬邨公詩也高伯祖鄆陵公號紫山之詩次之高伯祖號玉山之詩暨高叔祖行人公號崔桴之詩又次之省齋公爲先農部碧巢公之



女夫先給諫爲農部公之嗣子于高祖王姑爲親兄鄆陵行人則給諫本生之同胞曩第先本生六世祖中翰鷗亭公之子也玉山公爲中翰兄高州公號曉庵之子皆與省齋公姻戚至好如手足焉樞生也晚未獲瞻公之風采今得於圖中見之想見兩家先世氣誼之篤文字之契非獨鄉里稱羨已也公之後嗣宏詞制科蜚聲疊起書香綿遠以及於先生今文章經濟卓然無媿前修則自茲以往所以承世德而宏家聲者豈有量哉道光庚寅九月中澣表姪汪善樞

汪守愚

衙參詣南陽寮禮寬北府謂有葭莩親且屬文字侶遲通恠僮僕略分相爾汝談次出斯圖起立敬致語貂冠倚交牀此吾五世祖君家

小方壺館甥昔曾處靚妝母雙雛朱萸君眾女君五世祖姑我五世  
祖姥君家黃門公情悃調律呂同時諸弟彙繡句競織組洎歷百餘  
年大阮爲後序小阮盍繼聲卷尾有餘楮捧圖增悚悽欲語哽不吐  
緬昔吾兩家壇坫盛樽俎科名反厭多冠冕轉爲苦縹緲人有集紫  
誥歲增謹世德無殺隆人事有乖迂高門盛猶昔衰闕失繼武子姓  
多不才如我尤喆窳蓋篋圖與書悉付楚人炬狂癡根性情崛強入  
腰膂一官坐蹉跎廿載乏建樹親朋或非笑仕宦誰肺腑公今已通  
議轉瞬拓邦土施家並施國將大振先緒少迂匡濟懷爲我規進取  
勉焉紹清芬自然致華旒略追曩所亡恢復舊裘杼尊祖與睦姻次  
第力共努先靈儼在茲聞當笑相許左券視此篇瓣香日虔炷

春林讀易圖

方薰畫

方薰

棧雪消來江草萌春風重見故園情一編已測盈虛理夷險均能得此生

廷右茂才以尊大父藥房先生春林讀易圖遺照見眎俛仰今昔不勝愴然奉題六十八字既以志感兼質廷右

趙懷玉

讀易何處好時向春初林梅花四五點已見乾坤心乾坤心茫茫不  
外剝與復蒙難老還鄉孫枝燦盈目展卷音容尙儼如研朱手澤在  
遺書假年不惜韋編絕知是平生得力餘





蜀道歸裝圖

對牀風雨之樂已隔數年寒夜不寐望遠有懷寫此以期來  
歲唱刀環也癸未小除夕春橋方藹

含叔七兄待罪蜀中三十六年蒙 恩釋放回里感而敬賦

乍見猶疑魂夢閒旋知有 詔得生還頓教舉室歡無極回憶當年

淚尚潛連夕燈花曾送喜一朝酒盞共開顏別時少壯今衰老果是

相逢髮盡斑

歲戊子余寄詩有云只愁歸  
有信彼此已華顛今果然矣

同懷凋謝幾傷神故里他鄉剩兩人詎意斷鴻仍作侶何期枯枿再  
生春 九重恩大知難報歷劫身留許自新家計好營田數畝耦耕  
長此樂天倫

謹案生高祖藥房公

一字舍叔

天性真摯遇險不避難乾隆庚午代

兄胥靡入蜀孝友之風感動行路高叔祖春橋公常念風雨對  
牀望歸綦切癸未小除夕豫作歸裝圖其友于之篤足令後人  
興起越二十三年歲在丙午春藥房公始奉 詔釋歸年七十

有三矣歸舟過郡兄弟晤對喜極而悲悲極復喜春橋公爲賦  
紀 恩七律兩章遠近傳誦同本風人忠厚之旨心氣和平是  
皆得天獨厚之明証也閱百日春橋公卒藥房公哭之慟親友  
相勸白頭重聚胥悌第所感淚枯奚益公抑情強制然綴心之  
痛終不能釋諸懷時論公之孝友發乎性真超軼尋常云之樣

謹注



春橋草堂圖

曹芝題首  
張庚畫

張庚

書屋在何處窈窕春橋前  
被徑細草綠環籬芳蔓懸  
竹木紛佳氣禽魚多清緣  
習靜窗牖迴懷幽山居偏  
露挹庭花發香逐微風宣  
開帙對古人酌酒來名賢  
桑梓念獨切耆舊將手編  
孰云茲室陋異景賅八埏  
我圖亦不妄可與相流傳

沈初

春燕淺淺波迢迢短籬曲  
岸長柳條荒烟遠水紛作  
態草堂拓處橫春橋江南  
山水多平遠茆厓沙亭盡  
清婉不須春色放玲瓏自  
有高情足偃蹇疏篁抽筍  
桑葉齊催耕喚起人把犁  
南村一夜新雨足平

疇四望春陰低人間俯仰成朝暮只有春風自來去古今泉石滯幽襟但指雲山最深處

王藻

瓜田外史畫無雙寫此茆堂帶短杠脩竹甘蔗水楊柳翠陰深護讀書牕

女桑官柳道旁姿西浙風光百谷詩

桑柔渾似女柳短未成官王百谷嘉禾道中詩也

記得

來尋雞黍約橋邊繫艇早春時

璧合珠聯翰墨場諸昆才地各琳琅文章氣誼誰能續心折而今季最良

握手河梁雨雪綿不禁懷舊話從前明年相訪梧桐里好趁疏梅欲

放天

張棟

春橋行屈曲訪舊到書堂  
脩竹搖窗綠梅花繞座香  
吟情原跌宕畫意轉微茫  
對此心同賞相思夢幾長

去牘君歸日扁舟鶯脰湖  
心情早自澹嗜好與人殊  
遠跡符鷗鷺清機妙鷓鴣  
懶伽老居士作意繪成圖

昔日交情在回思憶惘然  
唯君真健者斯道一人肩  
漫說滄桑變頻嗟歲月遷  
吾廬高枕在共聽水涓涓

金農

蕪城相見落花天把袂披圖憶往年  
五七詩篇一杯酒橋頭曾繫櫂



頭船

百弓舊地話松筠荀氏門才爾最親何日秋堂重聽雨此中但少對

牀人

哲昆霞山香南二君下世已二紀矣

明 中

香茆曾許結岩隈別築閒門向水開爲愛白梅花作伴不禁春信過

橋來

搖牕柳色弄鵝黃蕉欲成陰穉竹香如此風光馮畫手盡情寫到讀

書堂

朱 琰

枳籬茆屋蘚痕斑十丈平橋水一灣春色到門看不盡畫禪詩律總

相關

玉作鴉叉竹作筍墨花藍汁洒春風平生大有烟霞癖消遣流泉積翠中

小閣攤書度幾春一家文獻記還真傾湖湧海爬梳徧醜舫新聲有

解人

君有曝書亭集箋注

當年江左數清華滿院吟聲透碧紗庾信白頭剩蕭瑟庭前淒絕紫荊花

林木翳然古渡頭聽泉刻竹致風流如何橋畔吟春憤工寫濠梁一

段秋

去年試秋水賦冠一郡

隔溪烟樹暖芊眠溪水如雲碧漲天一櫂春流好乘興倩誰著個米

家船

烟紅霞碧影婆娑到夜清光裊綠蘿可道揚州春似海月明二十四

橋多

兄將有維揚之行

門外通流綠一渠水鄉風味近何如年來不下楓江釣

余曩客震澤曾作楓江坐

釣暫借茅亭看打魚

迓雲龍

君家兄弟早周旋回首交情一惘然丁卯篇章參佐宅披圖重到草

堂前

春橋欲補桐君錄秋水能忘竹友船三十年來真隔世知君也感棣

華篇



李治運

竹樹橋西一逕通  
寧開書幌對春風  
吟依杜老波濤闊  
畫展維摩翠靄空  
放艇有時還載鶴  
彈琴隨意送歸鴻  
客來好共傾佳釀  
醉看飛花歷亂紅

曹芝

舊壘年年海燕回  
草堂無恙晝長開  
旁人爭識揚雄宅  
歧路偏登郭隗臺  
笑我生涯初敗絮  
憐君心事畫殘灰  
披圖六月增煩鬱  
安得飛湍喧萬雷

杭世駿

清絕梧桐鄉溪流  
淨無滓老樹欹城頭  
平橋接沙觜  
年時記訪舊橋

下棹曾弭書堂八九間  
齋籀介溪淡堂外何所有  
疎籬結六枳花藥  
羅瑣碎雜樹椅桐梓堂中何所有  
萬卷百城儼七緯精內學六藝究  
微旨其人美且仁系出子朱子  
派從婺源衍家自白嶽徙兄弟元凱  
齊聲譽蔚顧比清言每忘疲晏坐或移晷  
別去勞心顏倏忽踰三紀  
或嬰鉤黨旤難紓家未毀或作山陽賦  
或製柳下誄驚心歲月邁作者四人矣  
季也洵最良芬若佩蘭芷辛苦葺舊巢  
跌蕩于文史好語萬又千下筆不肯止  
太息人琴亡悵悵意無已并將鵠原痛  
寫寄圖畫裏韓江間過我相見雜悲喜  
嗚呼君家客大半天下士一二墓草  
宿謂龔鑑王存者獨余耳卽此數閒屋  
歷歷尙可指君時甫勝衣玉豫姚世鈺  
雪好肌理聰明勤問字屢向几  
案倚卅年涼暄更蓄德日宏侈  
養成

鸞皇姿一日可千里樞衣兄事益友道故應爾吾衰形支離髮禿口  
無齒舊學漸毫忘幸也不卽死披圖慘不歡懷新兼歎逝題詩一申  
哀汪然淚盈紙

追憶舊遊兼悼霞山子年端叔兄  
弟率爾滿幅不自知其譎謾也

吳光昭

綠楊罩深林翠篠媚清沚斷岸略徇橫濼濼流春水草堂構山隅幽  
僻遠塵市中有高人居抱經究終始平生擅三絕道也進乎技猶復  
能達觀天地同一指我來留名園研席共棐几連牀步苦吟白戰靡  
堅壘各負澄淡懷利名等糠粃鷄鳴風雨晨願言結彼美

江炎

亘長虹梧桐鄉裏垂楊樹樹低映草堂最好當三月花影倒窺天鏡



用張玉田句

湖水淨看浴遍苑央刷羽齊交頸思乘舴艋便訪到門前綠

陰一片不數雪中興 江南外家在西干問政十年荒廢難整對君

畫裏安居意感我萍踪無定冬尙剩正此際黃梅放向疎櫺等春盤

餽飮總輸與歸時留賓罰瓊佳處共吟詠

調寄邁陂塘

張四科

茅堂側飛虹一道闌干直闌干直春波倒印柳絲低拂 依稀萬里

橋西宅疎狂卽是滄浪客滄浪客纓塵濯盡長歌天碧

調寄碧雲深

王又曾

小郭雨晴深春花暝茆堂間對芳草檻前烟樹織屋後風篁掃藥欄  
又都放了想簾心篆爐香裊几淨烏皮硯磨龍尾長日鎮清嘯攤書

那知昏曉但爬搜庫部箋注蟲鳥

尊注曝書亭集將次告成

冷尋驢背句靜下溪

滑釣村橋偶策枯筇立更贏得詩人丁卯同調少除非是成都杜老

調寄璫  
璫四犯

閔華

紅板搯梁香茆縛屋幽居恰稱詞人弱柳疎梅風光無不宜春雨餘

碧蘚滋三徑靜愔愔流水籬門最憐渠金石歌聲隔舍常聞 東頭

小閣應猶在問夜牕燈火誰與平分惱亂吟情怕逢飛雁離羣時清

未許林栖穩恁才名易達楓宸想他時珥筆餘閑憶此松筠

調寄慶春澤

沈大成

略約橫溪口遠精廬竹娟梅姹嬾嬾新柳髻凡湘簾無塵浣永日一

編在手任丹墨淋漓衣袖詩老句文華藏海賴箋疏書部窮誰某先

生

有曝書亭集注

閑選調譜紅豆 千金圩畔花如繡占及山數弓暖翠自成

深秀從道清江風華盛洗句更居其右但篋底雙龍欲吼蓬觀乘查

終可到况馬卿詞賦矜千首且擲筆爲呼酒

調寄賀新涼

### 天目記遊

### 幻隱菴

陳嵩慶

選勝初地遊百折藤蘿逕樹壓寺門惜雲臥山僧定高樓杳靄閒飄  
落下方磬

### 東塢菴

何太青

逕路攀躋絕奇峰勢不羣三更紅日上當戶碧雞聞深竹靜虛抱疎



鐘清遠氛我曾携臘屐猶識舊烟雲

半山寺瀑布亭

爲弼

一亭兀半山飛流鬱怒甚跳珠迸雪霜坐對寒欲噤恍然到匡廬奇  
觀豁夢寢松綠杉更青積澗拾餘瀋側聽宛鼓鐘琴筑猶小品卻羨  
山中樵洗耳常作枕閱此動者機清冽性所稟鳥飛遠避聲魚游忽  
驚滄澄觀觸余懷就僧乞瓢飲

西方菴

陳嵩慶

危闌抱山斜涉磴且前卻出險倚孤筇憑虛俯飛閣檐端聞妙香時  
有松花落

千丈岩

何太青

天目垂兩乳蜿蜒皆巽巽中峰爲丈人茲岩乃其曹斷崖參枯禪遺  
錫飛重霄逕路忽已絕遜彼升木猱昔我肆遐躋攝衣登雲凹山僧  
面蒼翠補屋依山牢仰見飛鴻冥俯瞰松杉梢秋空木葉脫瞥見懸  
危巢靜者心多悟放眼窺崇高

老禪堂

彭邦疇

我聞道書三十四洞天太微元蓋乃在天目之高山拔地三千九百  
丈兩池噴薄素練當空懸頗怪東坡老居士曩時宦跡遊於潛雲中  
兒聲咫尺不往聽但將蓬沓溪上歌嬋娟我思勝覽五岳未登一披  
圖何幸窺仙源春橋先生雅有烟霞癖版輿當日歡駐南陔前携筇  
躡屐恣登眺歸來染翰灑向銀光牋畫成六冊詩成五金堂玉柱幽

怪窮雕鏤眠蠶細字揮墨妙不數廣文三絕維摩詩畫禪從孫侍御  
述遺事珍重奚翅千琅玕補題巧合天衣縫作序獨據羣山顛誦芬  
詠駿延世澤招邀賓從俾傳觀高齋雲氣忽晝湧恍若置身樓閣杳  
靄虛無閒抑聞茲山下舊有彭宅里云是我祖商大夫千年遺蛻留  
於此噫吁嘻世間大年曾有幾八百歲後且復爾矧乃浮生等朝露  
胡爲局促風塵裏會當與君解脫尋幽遐不辭五斗痛飲餘杭老姥  
家

先八叔祖諱方藹字吉人號春橋浙江桐鄉國子生就翰林院孔  
目職乾隆辛巳歲 高宗純皇帝南巡召試二等又獻畫冊拜  
賜文綺性至孝友憶爲彌十六歲之春日先大父自西蜀旋里公



喜而賦詩有家計好營田數畝耦耕長此樂天倫之句白首一堂  
怡怡語舊鄉族至今爲美談此天目山紀遊畫冊乃乾隆戊戌春  
余先吟咳叔秉鐸於潛時迎養至學官署公耽山水日策藤杖徧  
遊山徑歸卽摹寫并題句其上公之孫子裴弟與余同寓京華以  
遺墨手自裝治屬余題句余敬觀冊內一曰幻隱菴二曰東塢菴  
三曰半山亭瀑布四曰西方菴五曰千丈岩六曰老禪堂惟第三  
頁闕題句余乃補擬一首題於半山亭瀑布畫冊之下公著有春  
橋草堂詩集小長廬漁唱已刊成行世繪事工山林樹石出入於  
董尙書文待詔之間花鳥則純法南田晚歲愛寫梅余少時侍側  
公時授其法不勅此冊爲子裴弟世守將徧丐名公題詠爰謹志

崖略撫今追昔不勝憮然道光元年秋八月姪孫爲弼敬識

花卉冊

壬午歲三月六日武林門外迎 鑾敬畫花卉冊進呈蒙

恩賜絃恭紀方藹

芹曝誠輸輦道旁寫生敢說竝徐黃同揮繭紙邀宸鑒獨得蘭縑

出尙方

時進畫者六人惟方藹畫冊收入秘府并叨賞賚

織就無殊宮錦樣擊來猶帶

御

爐香從茲薄技高聲價不羨璣璣作報章

敬題春橋先叔祖花卉冊後

爲弼

妙繪吾家大有人筆端觸手自生春

先高祖東臯府君善畫竹先伯祖浚谷公先叔祖春橋公善蘭

梅竹菊翎毛俱入神品爲弼自髫齡卽好東塗西抹至今今年已四十餘矣雖公私厯碌而仍偷暇爲之以性之所好亦不敢墮家學也

行宮獻畫蒙宸賞仰見先皇鑒別真

石林雅好富收藏

葉雲素先生招飲出此冊見眎

脫手相貽喜欲狂

報以六朝周仲鏡訂交金石永毋忘

余在平湖張秋畬家得周仲鏡一  
又在武林市肆得周仲鏡一

真合璧也今以一鏡歸雲  
素先生易先叔祖此冊



入蜀省親圖

謹按先本生高祖藥房公緣事胥靡蜀中歷三十八年曾祖薌圃公入蜀省親方蘭墅先生爲作水陸兩圖武進趙味辛先生作序送之序文列入傳志錄同人題詠靡不推重孝子之行迨歸復屬蘭墅先生繪裝圖抵家慰母江都焦理堂先生所作記尤沉摯之榛謹識

朱子仲嘉省覲入蜀余已繪圖贈之矣閱趙子映川所爲文并詩則余不能無辭乃復吮毫作歌書其紙尾云  
方薰

蜀山高兮蜀水深梯天之難兮從古今黃牛白馬波屢折白鹽赤甲歸千尋燭龍迴照日色薄纖阿不到蟾光沉林煙嵐氣錯昏晝巖嶭

石壁羸羣陰君家老翁久留滯骨肉兩地情何任去時君幼今已壯  
一十八載縈寸心白華奉母見君志把卷願做書中蟬臨風憶父轉  
愁思螢窗涕泗雙泫泫嘗從夢寐見顏色一夜離恨生秋衾今冬告  
母獨長往陸從烏道舟巴瀟臨別叮嚀煩再四有淚且莫沾衣襟征  
衣不少慈母意密密綠縷縫宵鍼况茲歲晏風力峭吳綿濕透嚴寒  
侵望雲犯雪向前路別恨乃復牽朋簪我欲從之躡嶽欵手披浮雲  
捫曉參題詩欲招杜陵叟共聽山水流清音路長翮短不可臨嗟乎  
我亦無巢禽窮猿哀鳴挂脩棧瘦馬登頓迴空林風餐水宿歷險阻  
外無所憚中由悅畫圖注目轉惆悵深杯絮語分餘斟買驢早發錢  
江水杜鵑啼春紅滿岑遲君從父還故國蘭陔日暖華森樛君家骨

肉會有日悽然誰聽孤兒吟

趙懷玉

生兒別父十八載蜀道如天那畏難豈爲朋交怨離曠好將書札報  
平安星河夜艇穿三峽風雪朝鞍走七盤知爾中宵有歸夢北堂清  
淚未曾乾

憶去歲三月薊圃大兄以入蜀省親圖索贈長歌余賦此奉題  
旋因先慈疾作未及錄冊九月初痛遭大故數蒙慰唁兄言歲  
暮將有入蜀之行乃未幾而忽溘逝鮮民之生重以寢門外之  
痛長君珍孫屬余擇地余於小西溪先人墓北二里之帷圩爲  
君卜吉將以十月十三日葬披圖並記不自禁其揮淚如雨也



已

張誠

白雲茫茫西極天，劍門仙閣相鉤連。中有一人歌慎旃，茫鞋繭足窮  
其巔。咄哉妙手丹青傳，開緘忽起征塵烟。君別高堂十八年，總角未  
幾鬚眉鬢。一朝相見魂黯然，悲喜交集情纏綿。君承嚴命守墓田，身  
歸故里心天邊。倏忽歲月更變遷，春風夜夜啼杜鵑。錦官城中愁不  
眠，蕭蕭白髮非從前。焉知終夕無懸懸，想君默坐如針氈。若柰倚闕  
深情牽人生，那得皆萬全。上書終古緹縈賢，薊圃嘗有句云上竭力  
自得皇天憐。問君何日重遊川，爲君三復蘭陔篇。

顧汝修

京華勝友昔如雲，桐鄉朱君字端叔。風流倜儻稱人豪，三載瀛洲氣

誼足君萎萱花廢蓼莪長辭宦海臥嘉禾廣陵握手重嘆息

癸酉秋  
余晤端

叔於維  
揚舟次

有弟益州悵蹉跎弟曰藥房人大雅拋兒雙髻垂垂者早晚

哀號望爺歸四座聞之淚欲瀉彈指韶華十六春老我柴扉錦水濱  
扣門客有青雲氣乃是當年垂髻人秦關蜀棧勢嶙峋吳儂錯認重  
逡巡嗟君匹馬來何壯一片蓮心切天倫手挽鬚眉証此身悲歡交  
集兩情伸但得阿翁含笑看回頭萬里失艱辛行將返櫂駕湖潯又  
見畫圖巫峽真細語北堂靈樞好他年綵舞娛雙親我披此圖悽欲  
絕棖觸墳簾舟中說天涯白首憶羣仙雨散煙消空勞結

張棟

岷岵重賡長短吟捫參歷井苦相尋八千里外艱難路十九年來離

別心未必鬚眉遠似昔空交涕淚復沾今  
慰親兩地情誰識圖畫緣  
知意象深

日落煙生遊子衣遙瞻劍閣勢巍巍盤江直上白雲渺繞棧驚看紅  
葉飛萬里辭親含淚別一身念母目霜歸欲知孝子辛勤意莫向圖  
中間是非

楊謙

河橋風雪不勝寒省覲寧辭行路難馬首蠶叢程萬里天邊鳥道走  
千盤趨庭未覺容顏改秉燭還如夢寐看回憶倚閭人在望早馳尺  
素報平安

錢伯壩



早歲輕乘入峽船南冠羈滯到華顛那知萬里尋花夢卻爲青山住

幾年

花萼蜀山名

萬峰迴合若連環遠道窻親向此間想得鶻啼猿嘯處高堂爲爾一  
開顏

程晉芳

倚船窗眺蛾眉雪絕景何曾易得來可柰思親逢急難愁看落日下  
長堆江隨峽束枝枝瘦樹有鶻啼字字哀此種畫圖難過眼引人清  
淚墮瓊瑰

賈朝宗

非慕蠶叢賦壯遊庭闈眷戀不遑留瀟湘煙雨夔巫月盡惹征人陟

岫愁

先生用晦方蒙難令子能文自克家載酒草元頻問字法言虛授愧

侯芭

戊寅秋藥房先生以讀書家法寄示癸未適蜀遂得請業左右

鷲肩火色早騰飛莫向西風淚漬衣待得陳情 螭陛後板與親奉

白頭歸

萬里萱庭輕絕裾雲封巫峽少鴻書展君定省西行卷目斷巴渝子

舍虛

家嚴慈亦寄蜀未歸

方藹

汝父罹憂患于今十九年弟兄何日聚書札幾回傳天道真難問人

情幸見憐

謂費曹二公

只愁歸有信彼此已華顛

嗟爾思親切渾忘蜀道難捫參兼歷井水宿更風餐行囊愁空乏征  
裘慎薄寒慈幃憶游子須早報平安

總角遭離別相逢已壯時親懷悲復喜家業問方知婚嫁經營畢

去歲

爲仲嘉授室今春嫁  
姪女於維揚汪氏

門庭黽勉持語翁休違念癡叔幸非癡

陶澍

十八年來陟岵思七千里外路透遲情殷定省三巴日力盡馳驅九  
折時至性共推心匪石披圖猶有淚如絲誦芬詠德貽型遠忠孝門  
風凜在茲

歸裝慰母圖

阮元



三十七年胥靡以鋪非有愷弟曷代兄辜解一蜀棧雲寒烏啼古木非

有孝子曷省父獄解二貧無丸熊淚濕機杼非有慈親曷支門戶解三行

道揚名稽古之力非有文孫曷彰先德解四

梅曾亮

不忍兄罪弟代羈子念父羈步省之痛夫念子有婦獨處傷伊威省

父父安在乃在蠶叢蜀道陰雲古木萬里天西垂望夫夫竟來三十

七年少出而老歸家人不識聞者為噓唏嗚呼孝子元迦矣其有知

而無知弟友子孝婦義天所慈侍郎起家光國儀有圖掩淚披有詩

泣血題使我展讀心神悲嗚乎孝義獨行列傳史所司誰載筆者徵

此詩

黎吉雲

蜀棧詰屈行李艱古木蒼鬱陰雲寒驟網替戾慘徒御山禽格磔摧  
心肝問客來何從省父成都獄代兄役胥靡不見馬生角問客去何  
適慈親久睽隔汲鬻措持勞望遠血淚竭柴門向夕鵲聲喜踉蹌負  
擔兒歸矣爲述圍扉幸無恙行奉金竿返鄉里此畫流傳經幾時繪  
出全家孝弟慈艱危孤詣人莫知真宰上訴天知之吾師崛起金閨  
籍中外勛名照金石先芬扇發後嗣昌天道方知無假借願乞此圖  
摹萬本以爲萬古倫常作標準

覺羅崇恩

人生處順境奇節未由見古來大賢孝恆值人倫變我攬歸裝圖廢

卷發三歎卅年困胥靡悌弟急兄難故園田就荒賢哉婦誠健孝子  
奉慈命萬里穿雲棧疏食詎果腹短衣不掩胛手足盡胼胝寒暑恆  
交戰省父難久留將母有餘戀二老尙星霜一身先露電夫婦雖重  
聚父子竟不面奇節萃一門金石不勝讚千秋萬世名同登孝義傳

顧文彬

行李客身單崎嶇蜀道難躡風霜萬里山川幸是靈椿無恙在歸報  
與北堂萱 辛苦舊熊丸流光卅七年數更番離台悲歡便赴玉樓  
休抱恨兒死別父生還

調寄南樓令



竹柏得真圖

方蘭墅  
薰畫

謹按先曾祖仲嘉公自蜀省親歸取左太冲峭蒨青葱間竹  
相得其真詩意屬蘭墅先生圖之自坐石上襟懷高遠可仰  
見矣柘田公別字也之榛謹識

趙懷玉

萬里初歸蜀道難一竿新理柘湖灘竹堂栢閣風流遠珍重還從此  
畫看

倪家高閣米家船五畝閒居五畝田一別歲寒春又半梅花零落雨  
和煙

張人棟

高標玉樹與隋珠信是南鄰也姓朱西蜀省親馳匹馬北堂奉母感  
巢烏數年同席惟子女一點閒情寄畫圖笑我亦曾傳阿堵海濤滾  
滾興全麤

恣幽尋脫帽單衣蔭茂林皎皎當頭天際月琤琤盈耳靜  
中琴可知背俗非諧俗一任長吟更短吟試讀愚溪新句子行間字  
裏盡兼金

沈燦

濯濯風前柳何人不道君胸藏充萬卷筆陣掃千軍至孝憐懷石登  
山切望雲子規吟自苦蜀道險誰云雞黍晨供母琴樽夜樂羣聞名  
欽李迪覲面識劉殷衡字東西接往還蚤暮勤探花園並入買醉酒

微醺示我傳神妙不嫌眾謗信長林看獨往得趣想無垠幽壑全高  
寄清標謝俗氛自慙衰病甚琢句奈龍文

張人標

朱君文采誰與倫形貌映麗神仙人數年與之共晨夕如坐春風如  
飲醇文章崢嶸入平淡詩篇卓闊兼清新鹹酸與俗更殊好几席瓊  
璨羅古珍澆胸素不藉清聖問字日常多嘉賓一從卜居南河曲爐  
香茗椀同逡巡春華妖艷疇不慕底似竹柏饒清真男兒未遂凌雲  
志只合邱壑藏其身會得此意畫此幅方生妙筆能傳神足底惟穿  
阮孚屐頭上懶頂郭泰巾尋詩獨往秋色裏深淺妙句抽紛綸霜幹  
拔地龍拏攫雲峰插天鐵嶙峋何來飛雨晴日灑奔流千丈光粼粼



心謀耳謀得佳趣一掃紛秩無纖塵嗟余落拓過二十長年善病空  
食貧披圖大笑忽有得行當隨君學隱淪

望雲圖遺照

嗚呼此先大夫望雲圖遺照也寫真者爲嘉興張君貢植時乾隆癸卯之季秋是年冬先大夫將省先大父於西蜀行有期而遘疾遂於初冬廿八日捐館舍其明年求父友石門方蘭墅先生補圖圖名望雲從先大夫思親之志也越三年丙午先大父旋自蜀骨肉重聚先大夫不及見矣言之痛心此圖攜之京邸已三十年道光甲午十月廿八日率弟爲幹子善旂善驥姪善離善楹設奠和淚謹記霜露之感逾五十載敬告後嗣世守云不孝男爲弼

爲燮生僅八閱月卽遭先君子見背鮮民之痛及今五十三稔矣道光乙未春正七日省視伯兄於淮濡漕節署齋公餘鐙次樂聚天倫緬述先德翌日恭

展先君子望雲圖遺照謹讀伯兄甲午年誌跋語切攢心淚垂沾膝  
形容想像痛何如也男爲燮謹記

咳蘭圖

圖已佚詩從曼  
老集中鈔錄

陳鴻壽

古人潔孝養滫瀡供盤匱廣微取義微因之譜笙詩幽蘭被蘭咳采  
采雨露滋峭蒨青蔥間選句日月寢易馳斯圖繪已久猶及親顏怡一

官雖冷曹近與停雲期朝登蒼嶺南暮宿梅岑西陲絕巖陵灘明發  
心自夷維余尙髫髻怙悵春暉遲種諉諉復茂相視無差池胡爲今  
日看孽涕增悲思悽風吹重襟慘焉逢百罹翻令樹諉子補此咳蘭  
辭助哉增爾虔罔或游盤時